



KHUTBA JUMMAH
HADHRAT MUHYI-UD-DIN AL-KHALIFATULLAH
MUNIR AHMAD AZIM

27 Septembre 2019
27 Muharram 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : **AL-HUJURAT : GHIBBAT (PARTIE 3)**

Par la grâce d'Allah, mo pé continuer mo 3^{ème} partie Khutba Jummah lor le sujet « *Ghibbat* », cherche défauts de les autres, espionner, gagne doutes, mette fausses allégations, blâmes etc., et azordi sa Khutba là continuer.

Plusieurs fois en gardant bane relations hypocrites avec ou bane frères ou sœurs innocents, ou pou vine ene dimoune hypocrite. Et kan dans ene place hypocrisie née, bé dans les autres places aussi ena bane possibilités pour hypocrisie développer.

Ene dimoune ki vine ene habituer d'hypocrisie, bé c'est le « *Ghibbat* » même ki vine ene pli grand facteur ki aide li vine ene habituer d'hypocrisie. Ene hypocrite veut dire ene quelqu'un ki habituer cause dimoune derrière so le dos mais devant dimoune là, li dire exactement le contraire et li donne dimoune là l'impression ki li fine cause en so faveur. Devant dimoune là li dire bane zaffaires ki bien différent de so vrai point de vue et de céki li pé penser vraiment. Sa c'est hypocrisie. Et kan ou hypocrite avec bane dimoune, bé doucement doucement sa hypocrisie là faire so chemin dans ou la foi aussi ; lirlà même ki ou commence ena ene relation hypocrite avec le Amir Saheb, ou Naib Amir, avec le Sadr, le Qaed, avec bane responsables du Jamaat, et lirlà ene « *Ghibbat* » ki ti individuel, cette fois-ci, li

vine ene « *Ghibbat* » de organisation. Et kan ou cause contre le *Nizaam-e-Jamaat*, bé sa li encore ene pli grand péché. Parski là-dans, ou propage bane tel mauvais causer contre bane dimounes ki travail pour la cause d'Allah, ki bane les autres dimounes commence dégoûte zot et diminuer zot coopération are zot.

Parfois kan ou faire « *Ghibbat* » de bane responsables, bé bane dimounes ki écoute ou là, zot dégoûter, zot dire : « *Bé si sa c'est la religion [l'islam], bé nous tous pluto nous éloigner.* » Li exactement kan fine expulser moi du *Nizaam-e-Jamaat Ahmadiyya*, bé lor bane l'îles, couma l'île de la Réunion, Mayotte, Seychelles, Rodrigues etc., kan bane délégations de bane responsables du Jamaat Ahmadiyya de Maurice fine alle lor sa bane l'îles là en l'an 2001 commencer aller même, zot alle faire « *Ghibbat* », cause toutes sortes kalités menti, fausses allégations ki mo droguer, mo prend médecine et ki ensuite mo dire mo gagne révélation [c'est-à-dire, sous l'effet de sa bane médecine là]. Au contraire zot ti bizin conner ki médecine mo ti pé prend pou gagne révélation, zot aussi zot ti capave prend ! Ena ti qualifier mo bane révélations comme révélations sataniques, *Nawzoubillah min Zaalik*.

Kan zot fine agir coumsa, zot fine pluto faire sa bane dimounes lor sa bane l'îles là pli sauver avec l'enseignement de l'islam et Ahmadiyyat. Zot ti croire zot pou casse ene grand paké et dimounes là-bas pou plonger dans zot mensonges. Au contraire, c'est zot-mêmes ki fine gagne grand humiliation devant sa bane dimounes là. Parski des z'année et des z'année mo fine travail lor sa bane l'îles là et avec sa bane dimounes là, et sa bane dimounes là conne moi très bien, ki kalité dimoune mo été et ki kalité dur mo fine travail lor bane l'îles et même beaucoup parmi zot lor tous sa bane l'îles là fine dire : « *Si missionnaire dire ene tel dimoune couma Sheikh Munir Azim fine expulser en dehors de sa Jamaat là, bé nous, ki faire nous bizin reste dans sa Jamaat là. C'est à travers li, nous fine conne sa Jamaat là.* »

Et lor là, ena fine alle lor ene l'île, li fine dire ene grand famille ki ti prend *bai'at* avec moi, et ki sincère et fine faire beaucoup kitchoses pou Jamaat ; alor pou gagne sa famille là dans zot faveur et d'autres choses encore, li fine passe li comme ene juge à la cour de justice à Maurice et aussi ena fine passe li couma ene grand avocat à Maurice. Ki zot pas fine faire dans zot imbécilité ?!!! Zot fine tombe bien bas, kot ziska zordi dimounes lor sa bane l'îles là cause de mauvais lor zot, comme-ci dirai, dimounes pé donne zot malédiction de céki zot fine faire,

mais pas pour sa le Jamaat Ul Sahih Al Islam pas continuer faire so bane grand progrès dans sa bane l'île là ! *Alhamdulillah Summa Alhamdulillah.*

Sa bane dimounes là fine perdi tout zot l'intérêt et tous zot bane enthousiastes ki zot ti ena pou le Jamaat Ahmadiyya, kan mo ti établi le Jamaat Ahmadiyya dans l'année 1990-2000 lor sa bane l'île là fine disparaîte.

Donc, façon ene hypocrite li attaque ene quelqu'un ki pé travail pour la cause d'Allah et li attaque aussi bane les autres office-bearers ki pé travail pour le Jamaat li bien dégoûtant. Et pourtant ou pou trouver ki sa commencer par ene la haine, ene la jalousie et ensuite sa vine ene « *Ghibbat* ».

Donc, « *Mohabbat* » et « *Ghibbat* » pas capave reste ensemble. L'amour et affection péna aucaine liaison avec le « *Ghibbat* ». Ena plusieurs façon nous capave combatte le « *Ghibbat* ». Ene façon positif c'est ki ou établi ene relation d'amour avec les autres et aussi gagne l'amour pour bane ki pé travail nuit et jour pour la cause d'Allah (pour le Jamaat d'Allah) et établi ene lien d'amour et ene respect pou bane ki roule l'organisation du Jamaat avec sincérité et *Taqwa*.

Ou bizin pense li coumsa, ki : « *Nous, nous libre et nous pé faire nous bane travaux personnel. Tandique ki bane responsables du Jamaat, zot, zot pé faire bane travaux de la religion et si nous garde bon relation avec zot, bé li pou ene moyen pou nous gagne le plaisir d'Allah. Parski c'est pour la cause d'Allah ki nous pou garde bane bons relation avec li.* »

Si bane dimounes pense coumsa, leri là intentionnellement zot établi bane relation de respect avec bane responsables de zot Jamaat, kan même bane responsables là pli petit ki zot et ensuite zot faire démarche à développe ene lien d'amour pou zot. Même ki ou péna sa l'amour là naturellement, ou bizin forcer à développe li. Parfois respect changer en amour. Et parfois l'amour changer en respect. Sa deux sujet là zot naturellement complémentaires. Mo pas pé cause l'amour naturel ki créer suite à ene manifestation de beauté, Non. Moi mo pé cause l'amour ki gagner à travers certaines bane beautés, c'est-à-dire l'amour ki vini parski certaines zaffaires ki ou content ena connexion avec sa bane zaffaires là. Si ou ena l'amour pour quelqu'un, bé ou pour ena aussi l'amour pour bane zaffaires ki ena connexion avec sa quelqu'un là. Bane zaffaires ki sa quelqu'un là content, ou aussi ou content zot. Même ki ou, ou péna ene l'amour naturel pour sa bane zaffaires là

mais ou développe l'amour là seulement parski sa dimoune ki ou content là ena l'amour pour sa bane zaffaires là. Et sa c'est ene vérité. Là-dans péna aucaine doute ki kan l'amour augmenter à ene tel point ki li vine comme ene folie, bé à ce moment là ou content tout kitchose ki ena connexion avec dimoune ki ou pé content là. Et là-dans ene dimoune pas capave faire nannié. Li pas capave contrôle li.

Donc, kan mo pé dire ou « *Mohabbat* », mo pas pé donne ou aucaine enseignement d'hypocrisie. Mo pé dire ou ene profonde vérité. Mo pé dire ou ki en réalité l'amour li ena so l'effet lor bane connexions aussi. C'est pourquoi plusieurs fois mo fine mette l'exemple de bane *Sahaba* devant ou. L'amour ki bane *Sahaba* ti ena ti vraiment extra. Aujourd'hui aussi ena ene bane ki révendique bane tels l'amour mais l'amour ki sa bane *Sahaba* là ti ena vraiment ene lotte visage. Zot l'amour ti vraiment ene lotte même ! L'amour là ti dans zot lizié, dans zot visage dans tout zot lé corps. Sak partie de zot lé corps ti pé témoigne sa l'amour là. C'est pourquoi au commencement, kan mo ti en voyage et mo rencontre mo bane disciples/ compagnons (*Sahaba*), zot attrape mo la main et embrasser. Mo ti pé gagne honté, surtout lor bane îles et bane pays l'Afrique. Zot montrer bel l'amour et l'affection. Sa bane moments là mo ti pé gagne honter ; mo pas ti trop comprend sa l'affection ki sa bane missiés ti pé démontrer, et même mo ti pé penser, « *Eski c'est pas ene Shirk sa?* », mais en voyant sa respect, l'amour et l'affection là lor zot visage et dans zot lizié, mo fine reste tranquille.

Après ki mo fine faire *duah* lor là, Allah (swt) fine faire compran ki l'amour ki zot ena pour Nabi Kareem (saws), pour Hazrat Massih Ma'ud (as), pour l'Islam so l'enseignement, zot l'amour si grand et zot joyeux (content) ki zot fine gagne sa l'honneur là zot aussi pour trouve ene Messenger d'Allah dans zot l'époque, et les autres, Allah fine donne zot aussi sa faveur divine là, mais zot fine tourne les dos avec sa et zot, zot senti zot heureux, malgré beaucoup des épreuves, zot ressenti zot même comme bane *Sahaba* dans l'époque du Saint Prophète (saws) ou de Hazrat Massih Ma'ud (as).

Azordi parmi zot ena ene dimoune ki envoyer par Allah et Allah cause avec li et li vini de côté d'Allah pour faire revivre sa bane l'enseignements et travail ki Nabi Kareem Hazrat Muhammad (saws) ti vini pour faire, bane même l'enseignements

ki Allah (swt) ti envoyer à travers li (saws) pour l'humanité entier pour amène zot tous lor chemin d'ene sel Dieu.

Azordi aussi mo bane disciples senti zot heureux parski parmi des milliards dimounes ki vivre lor sa la terre là, zot fine gagne sa l'honneur là pour témoigne la révélation divine et couma révélation vini, couma Allah (swt) déssane So bane messages [bane messages divines].

Donc, kan mo fine bien comprend sa message d'Allah là, maintenant mo pas honté kan mo bane disciples attrape mo la main fort et ena ki embrasser et tout sa c'est ene façon ki sa bane disciples montrer zot l'amour pour le Khalifatullah. Donc, dans sa situation là, faudé pas mo offense sincérité ki ena dans zot l'amour ki zot ena pour Allah So Khalifa dans sa siècle là. *Alhamdulillah*.

Ki Allah Le Tout-Puissant faire zot reste toujours sincères avec Allah So Khalifa sans aucaine hypocrisie, sans aucaine show. *Ameen*.

Insha-Allah, mo pou continuer l'autre partie de mo Khutba Jummah la semaine prochaine.